



## ANUNSIO

Mediante un anunsio emití dia 20 di mart 2020, Centrale Bank van Curaçao en Sint Maarten (CBCS) a duna pèrmit pa banko i instituto di krédito komersial duna moratorio di pago di interes i kapital di 3 pa 6 luna pa tur fianza pendiente, sin ku e instituto mester krea un provishon adekuá pa esei. Ademas, CBCS a permití e bankonan komersial surpasá e *debt-service ratio* permití (esta, e porsentahe di un persona su entrada bruto ku ta bai na pago di debe, ku aktualmente ta 37%), te na un máksimo di 50%. CBCS a fleksibilisá algun di e reglanan di supervishon asin'akí pa por atendé ku e desafionan di korto plaso ku COVID-19 a trese kuné.

En bista di e impakto prudensial negativo ku esaki lo tin pa e bankonan komersial riba término mediano i largu, i e riesgo adishonal ku esei ta representá,

- CBCS no ta rekomendá pa sigui duna mas moratorio di pago. No opstante, e institutonan finansiero por sigui evaluá, pa kada kaso individual, ki sosten nan por ofresé nan klientenan. Den kaso ku un persona ku a hasi un fianza ta enfrentando difikultat finansiero di mediano òf largu plaso, mester atendé esei den kuadro di e normanan prudensial eksistente. Kada bes ku un instituto finansiero determiná ku probablemente e lo no logra kobra henter un suma ku tin habrí, tantu di interes komo di kapital, mester baha e debe ei inmediatamente den e instituto su bukinan (sea via un depresiashon direkto òf kreando un provishon p'e); i
- CBCS no ta permití mas pa e bankonan komersial duna krédito ku ta surpasá e *debt-service ratio* total di 37%. Esaki ta pa prevení ku e konsumidónan ta risibí krédito di mas i pa fomentá práktika di dunamentu di krédito prudente na Kòrsou i Sint Maarten.

Mas informashon ta disponibel den nos sekshon di pregunta i kontesta (Q&A) riba e tema akí, disponibel riba wèpsait di CBCS: <https://www.centralbank.cw/publications/announcements/2020>.

Willemstad, 18 di novèmber 2020

CENTRALE BANK VAN CURACAO EN SINT MAARTEN